

LA QUOTIDIANA

FMR Fundaziun Medias Rumantschas, Via da Masans 2, 7000 Cuiru, 081 544 89 11, redacziun@fmr.ch



L'electricitad vegn pli chara

Era las pendicularas sentan che l'electricitad vegn pli e pli chara. Ina sfida en vista a l'enviern vegnent. [Pagina 2](#)



Nua è quai?

En il lieu tshertgà oz en il Micromund brischa er in pitschen «fieu» e quai da di e da notg. El mussa la via, ma nua sa chatt'el? [Pagina 3](#)

FMR FUNDAZIUN
MEDIAS
RUMANTSCHAS

südostschweiz

ENGIADINA

Artists e public davant culissa unica

In dumengia chi vain hö lö la 11evla ediziun dal Guardaval Sounds. L'open air concert es gnieu fundo l'an 2011 da las vschinnas da La Punt Chamuesch e da Madulain in collavuraziun cun lur büros da turissem. Böt dals organisatuors es da spordscher ün evenimaint unic intuorn la ruina da Guardaval sur Madulain. Il focus musical dal Guardaval Sounds es miss sün artistas ed artists svizzers e l'entreda es libra per minchün. L'ediziun 2022 ho lö cun üna premiera e cun *Luka Bloom* e Ritschi im Trio daun la prüma vouta duos artists ün concert sü Guardaval. (fmr/cam) [Pagina 11](#)

SURSELVA

Ils fastitgs dalla veta



Cu Marlis Flepp arva sia cofra sveglia ella regurientschas da temps vargai. FOTO SUSI ROTHMUND

Mintga veta lai anavos fastitgs ed ils biars da quels van a piarder enzacu. Quei vul *Marlis Flepp* da Rabius/Trogen impedir cun sia purschida «beFRIEDEn» ni per romontsch, far pasch. Il concept ei aschi sempels sco buns. Cun confamigliars ni persuls vegn enzatgi tier ella per raquintar ord la veta, per seregurdar ed el medem mument reussescha ei savens da far pasch culla veta. Flepp registrescha ils discuers, ella porscha denton era las historias dalla veta en scret e cun fotografias. Alla dunna empatica raquentan attempai e pli giuvens bugen dil vargau, pon rir e bargir e magari era sliagir conflicts. «Ei schai a mi a cor ch'ils carstgauns nezegien lur temps, aschiditg ch'il temps ei aunc avon maun», declara Marlis Flepp. (fmr/sr) [Pagina 7](#)

GRISCHUN CENTRAL

Passa 200 unfants

Igl pass da vacanzas dalla Pro Juventute porscha er chest onn en program variont per unfants da Surses e Val Alvra. Chest onn sa participeschan cun 77 unfants da Surses e 130 unfants dalla Val Alvra damai passa 200 unfants da Surmeir allas purscheidas. Egna da chellas purscheidas è la viseta tar la scola da recrut a Coira. La FMR è stada preschainta cura tgi unfants dall'amprema anfignen seisavla classa on gia la pussebladad da visitar per en de la «Inf RS 12». Preschaints eran dantant betg angal unfants da Surmeir, mabagn er dalla Lumnezia e dalla Cadi. (fmr/gns/sab) [Pagina 9](#)

40 pianists da 22 naziuns

Dapi onns ei il gimnasi dalla claustra da Mustér internaziunals, duront questa e l'autra jamna ei l'internaziunalitad aunc per in bien ton pli presenta sigl areal dall'abbazia. 40 pianists da 22 naziuns laian inspirar da docents d'excellenta reputaziun.

HANS HUONDER/FMR

Hosp ella claustra ei numnadamein l'Academia internaziunala da stad da clavazin e quei per la secunda ga suenter 2019. Studentas e students dall'Euorpa, l'Asia e l'Australia sunan clavazin pliras uras per di, san visitar workshops e referats e survegnan leutier instrucziun persunala. «Ils tschun professers da clavazin ch'instruschan ein tuts fetg versai ed econuschents», di *Nina Orotchko*, l'organisatura dall'academia. Quell'academia ei reservada sullettamein pils pli ambizius e talentai: «Buca

«Buca mintgin ha las premissas da separticipar a quell'academia.»

Nina Orotchko, organisatura dall'Academia internaziunala da stad da clavazin a Mustér

mintgin sa separticipar, ei drova denter auter ina recumondaziun d'in professer ch'instruescha l'interessenta ni igl interessent.» Ils students rimnan ulteriuras experienschas a Mustér sin via a lur carriera sco musicists: «Ils biars vegnan bein a sepresentar sin tribuna internaziunala, mo ualti bein tuts vegnan era a stuer instruir per haver in'entrada sufficienta», di Nina Orotchko ch'ei oriunda dalla Russia. En dus onns ei in'ulteriura academia internaziunala da clavazin previda a Mustér. Schebein quella ha liug dependa en emprema lingia dalle finanzas. [Pagina 5](#)

«Igl è sco da dar lotto a la bursa.»

Il directur da las pendicularas da Mustér Stefan Arnold davart ils pretschs per l'electricitad. – Pagina 2



Il fö da la giuventüna da Ftan

Els toccan pro'ls prüms d'avuost sco ils brunchs ed ils lampiuns – ils fös süls ots. La saira da la festa naziunala s'invüdan numerus da quels fös sün munts e pizs in tuot la Svizra. Eir in Engiadina Bassa, tanter oter süil Piz Clünas sün 2793 m s.m. güst sur il cumün da Ftan. Quel fö vain fat daspö plüs ons da la societä da giuventüna da Ftan. Per las giuvnas ed ils giuvens da Ftan nun es quai però be üna pussibilitä per celebrar la festa naziunala, dimpersè eir per star ün pèr dis da cumpagnia. (fmr/an) [Pagina 11](#)



50030



Servetsch d'abunents e da
distribuziun: tel. 0844 226 226
mail: abo@somedia.ch

9 771424 749004



Gianluca Luisi ell'instrucziun d'ina studenta russa. Il professor dall'Italia ei enconuschents sco excellent pianist ch'ei buca mo engaschaus ell'instrucziun mobein era en biars concerts e festivals.

FOTOS HANS HUONDER

Exercitar e schar inspirar dils meglers pianists dil mund

El rom dall'Academia internaziunala da stad da clavazin exerciteschan, sunan e concerteschan 40 pianistas e pianists da 22 naziuns questa e l'otra jamna a Mustér. Instrui vegnan las participontas ed ils participonts – per gronda part studentas e students da musica – d'enconuschents musicists da professiun e professors. Per la responsabla per l'academia, Nina Orotchko, catta igl entir menaschi en claustra las cundiziuns optimalas per luvrar e sescolar.

HANS HUONDER/FMR

La claustra da Mustér cun sias numerusas localitads da differenta grondezia, las pusseivladads da star sur notg ed il sectur da gastronomia porscha ina basa ideala per la dimora da camps e gruppas. Aschia ni aschia durant il temps da stad cura ch'il menaschi dalla scola media ruassa. Quellas cundiziuns nezegia l'Academia internaziunala da stad da clavazin e tgi che viseta la claustra questa e l'otra jamna entaupa glied surtut giuvna entochen 28 onns da biaras naziuns digl entir mund.

Glied giuvna che vul sepefeczinar

All'academia separticipeschan pianistas e pianists dall'etira Europa entochen la Russia, Indonesia, Tailanda, Japan ed Australia, mo era da Singapore, Corea dil Sid e China. «En tut eis ei 40 persunas da 22 naziuns che vulan sepefeczinar al piano», di *Nina Orotchko*, oriunda da Moscau che viva e lavura dapi biars onns a Turitg. Buca saviu serender a Mustér per las duas jamnas dall'academia ha in pianist dall'Ucraina: «El studegia ell'Europa Centrala mo ei il mument tiels geniturs e resca da stuer ir alla front dall'uiara.» Las treis participontas russas dall'academia studegian tuttas en tiaras europeas e per quei motiv ei lur participaziun buca stada cumbinada cun formalitads specialas. Sper l'organisaziun da concerts ed il management d'artists porscha Nina Orotchko l'academia. «Plirs onns essan nus stai cun quella a Ftan e Samedan ell'Engiadina, ussa ei Mustér en roda», di la dunna che ha ina stretga relaziun tier la musica sco violonista, mo era sco consorta da *Konstantin Scherbakov* ch'ei in dils docents a Mustér. Davart las habilitads da Scherbakov ha la NZZ scret dacuort: «In dils pli impurtants pianists d'ozildi.» Il mardis sera ha igl enconuschent pianist concertau durant in'ura ella Sala Peter Kaiser dalla claustra. L'academia ha dil reminent liug per la secunda ga a Mustér. La davosa ga ei quei stau 2019. «Che nus havein uonn aschi biars participonts ha segiramein era da far cul temps dalla pandemia, pertgei tenor turnus havess l'academia giu liug igl onn vargau. Dalla caschun d'uonn han biars vliu seprofitar», constatescha Nina Orotchko.

Claras premissas da participaziun

Per saver separticipar all'academia da clavazin ston ils interessents adempir differents premissas. «Els ston documentar tgei studis ch'els fan ni han fatg. Leutier pretendin nus in attest, respectiv in scriber da recumondaziun d'in professor da musica che ha ni che instruescha igl interessent», di Nina Orotchko. All'academia exerciteschan tuts pliras uras per di, durant las duas jamnas ha mintgin tschun lecziuns privatas tier in dils tschun professors da musica.

Leutier vegnan workshops, prelecziuns e referats d'experts dil mund dalla musica cun clavazin. In element special che l'organisatura numna ei il seminari dalla fin d'jamna cun *Bruno Monsaingeon*. Il musicist da Paris ei enconuschents sco autur e reschissur, biars films portan siu bul musical. Sper l'activitad da musica en claustra gaudan las participonts ed ils participonts dall'academia era il sport ed activitads el liber ed emprendan aschia d'enconuscher la regiun. Terminaus vegn il program dall'academia ils 7 d'ost 2022. Entochen lu sepresentan tuts participonts a concerts singuls e per la fin dall'jamna dils 4 entochen 6 d'ost 2022 era a plirs concerts communabels. Els sunan gievgia alls 20.00 ella Fermata a Falera, venderdis allas 17.30 e las 19.30 en claustra a Mustér en favur d'affons ucrains, sco era sonda allas 19.00 el hotel Waldhaus a Flem.

Ils cuosts s'augmentan

«Nus gudin a Mustér cundiziuns veramein optimalas per l'academia e nosa finamira eis ei era da returnar che en dus onns», di Nina Orotchko. In problem che fatschenta ella denton giu ussa ein ils prezis carschents pli u meins sill'entira lingia. Per las academies vegnentas stoppi ella tschercar sponsurs, cass cuntrari seigien quellas buca realisablas. Cul daner che las participontas ed ils participonts pagan, pon ils cuosts buca vegnir cuvretgs ed in augment da quels ei pauc cunvegents, damai che biars han buca las pusseivladads finanzialas che lubeschon quei.

Ulteriuras informaziuns ein da catter sut www.musicaldiscovery.ch.



Quater alas e sis clavazins han stuiu vegnir transportai da Turitg a Mustér per garantir il menaschi dall'academia. Leutier vegnan pliras alas e clavazins dalla claustra.



Nina Orotchko meina in menaschi dil management d'artists e concerts ed organisescha denter auter l'Academia internaziunala da stad da clavazin che ha liug questa e l'otra jamna en claustra a Mustér.

OLDTIMERS

Autos vegls fascineschan Sandro e Natalia Deplazes

Sandro e Natalia Deplazes da Rabiun ein dapi onns fans dad autos vegls. Cun in oldtimer digl onn 1956 van els onn per onn ad in eveniment special el Tirol dil Sid.

GIONDURI MAISSEN/RTR

«La fascinaziun ei la tecnica, il fried e ch'ins sto luvrar per saver ir cun quei auto», di *Sandro Deplazes*. El ha fatg in emprendisadi da mecanist ed enconuscha mintga struba da siu oldtimer. La fascinaziun per autos vegls ha el adina giu. «Per mei eisi bi dad ir sin garascha e trafficar, prender dapart e schubergiar.» Gl'emprem ha el cumprau in VW Käfer, lu in vegl «Pontiac» dil pasterner da Rabiun. Mo gliez auto bueva bia memia bia benzina, aschia che quei ei buca stau in auto per liungs viadis. Lu ha el viu siu auto actual en in inserat ed ha cumprau el. Mo gia gl'emprem viadi encunter casa ha il «MGA» digl onn 1956 buca dumignau, aschia ch'el ei vegnius duas jamnas suenter sin in carr annex tochen a Rabiun. Leu ha el priu dapart tut, il motor ed ils girs, e mess en ina nova part sut digl l'auto orda da lenn sco gl'original e dapi lu mondi gl'auto sco in aunghel, di Sandro Deplazes cun in surrir.



Natalia e Sandro Deplazes avon lur auto, igl MGA digl onn 1956. FOTO RTR

Turas da bialaura

Il MGA digl onn 1956 ei in cabrio. «Quel ha buc aschi bugen aua, el ei in tec in sensibel». Ei sto pia esser bialaura per ir cun quei oldtimer. Cun sia dunna *Natalia Deplazes-Albin* fa el savens turas spontanias da bialaura. Era ella parta la pissiun per oldtimers. In termin el kalender dad els dus ei adina fixaus: dapi plirs onns van els ensem al «Südtirol Classic Schenna Rallye». Quai ei in eveniment nua ch'ei dat da veser rodund 130 autos vegls, mo era da guder la buna cumpignia. «Il bi ei da s'entupar cun buns amigs el Tirol dil Sid, mo era la cuntrada dallas Dolomitas plai a nus fetg bein», di Natalia Deplazes-Albin. Davos la roda vegli ella denton buc exnum seser. Ella sesi pli bugen dasperas egl auto e gaudi il viadi. «El mender cass vegness jeu schon aunc dad ir cun el», di Natalia Deplazes, mo quei seigi lavur corporala, la roda da menar seigi greva ed ils girs e freins seigien buca sco tier autos novs, quels drovien forza. Onn per onn fan els aschia rodund 3000 kilometers cun quei auto, la tura el Tirol dil Sid ei la pli lunga.

L'entira reportascha dils dus fans dad autos vegls Sandro e Natalia Deplazes da Rabiun ei da veser sin rtr.ch.

OPEN AIR LUMNEZIA

Ruaus a Degen

La foto muossa il plaun da Degen cul vitg, sias treis baselgias e la cuntrada. Naven dil Grep da Pleif miran ins encunter Rofna, senier ei Surcasti, dreg Vattiz e Vignogn. Avon in'jamna semeigliava quei areal in furmicler cun bunamein 20'000 persunas. Quei ch'enqualin ha pudiu resentir sco «canera», ei stau per las 18'500 «furmicas» musica, divertiment e deletg dalla stad 2022. Il pli grond open air dil Grischun en quei liug ei puspei secumprovas culla zona da campar e la zona da concert. Las equipas da construcziun e d'infrastructura han daferton fatg uorden e rimnau il rumien tochen sil pli pign pupi. Per in onn s'auda gl'areal denter Rofna e sogn Bistgaun puspei all'agricultura. (fmr/abc)



Igl areal digl Open Air Lumnezia, dus gis suenter che quel ei ius a fin. FOTO AUGUSTIN BEELI